

UVOD

Istorija trgovanja ljudima kreće od robovlasničkih odnosa u starom Egiptu, Grčkoj i Rimu. Novi svjetski poredak donio je nove oblike trgovanja ljudima ali uvijek s istim ciljem – sticanje materijalne ili neke druge koristi. Muškarci, žene i djeca su tokom cijele istorije čovječanstva bili spolno i ekonomski iskorištavani.

Danas su također podjednako izloženi opasnosti od trgovaca ljudima zbog spolnog i ekonomskog iskorištavanja. Trgovanje ljudima je najrasprostranjenije u Južnoj Americi, Aziji i Africi. U Evropi je ono postalo gorući problem nakon raspada SSSR-a krajem osamdesetih godina prošlog stoljeća zbog ekonomskih migracija tj. potrage za boljim životom na zapadu.

Prema procjenama Ujedinjenih Nacija, u svijetu se svake godine trguje sa dva do četiri miliona ljudi. Oko 200 hiljada ljudi je nezakonito dovedeno u Evropu svake godine, od čega je najveća većina namijenjena seksualnom izrabljivanju.¹

Osamdeset posto žrtava trgovine ljudima preko međunarodnih granica su žene, a sedamdeset posto tih žena i djevojaka prodano je za seksualno izrabljivanje.² Procjenjuje se da godišnji prihod od trgovine ljudima iznosi između sedam i trinaest milijardi dolara

U specijalističkom radu predstavljeni su osnovni elementi organizovanog kriminaliteta, sa akcentom na trgovinu ljudima kao dio organizovanog kriminaliteta, kao i mogućnosti borbe protiv organizovanog kriminala i trgovine ljudima.

Rad je koncipiran kroz nekoliko cjelina uz korištenje dostupne literature koja tretira navedenu oblast.